

**ՄԻ ՇԱՐՔ ԲԱՐԲԱՌՆԵՐՈՒՄ ՈՒՅ ՎԵՐՋԱՎՈՐՈՒԹՅԱՆ ՏԱՐԱԾՈՒՄԸ
ՈՐՈՇԱԿԻ ԱՆԿԱՆՈՆ ԲԱՅԵՐԻ ՎՐԱ ԽՄԲԱՅԻՆ ՆՄԱՆՈՒԹՅԱՆ
ՍԿԶԲՈՒՆՔՈՎ**

Բանալի բառեր – խմբային նմանության սկզբունքով, CVC հնյունաշարակարգային կառուցվածքը, առիստի հիմքը, բնութագրական հաստկանիչներ, հիմքական ածանց, և խոնարհման պարզ բայեր, պատճառական բայերի առիստի բեական հիմք

Արևելահայ աշխարհաբարի պատճառական բայերի առիստի (անցյալ կատարյալի) բեական հիմքը, ինչպես իրավացիորեն նկատել է Յ. Կարստը, առաջացել է մի խումբ բայերի եզակի հրամայականի ձևի և դրան համընկնող առիստի հիմքի ձևաբանական հարաբերակցության համարանությամբ, օր.՝ եզ. հրմ. **թռ դ, թե թ**, առր. եզ. 1-ին դ. **թռդ-ի, թեր-ի**, և, ըստ այդմ, եզ. հրմ. **հեռացոր իր**, առր. եզ. 1-ին դ. ***հեռացորդ-ի > հեռացր-ի**): Ի դեպ, ավելի վաղ՝ միջին հայերենում տեղի ունեցած նույնային համարանական գործընթացի արդյունք է նաև **դնել** բայի **դր-**առիստի հիմքը (***դիր-ի > դր-ի**), որի համար հիմք է ծառայել եզ. հրմ. **դիր** ձևը¹: Հայտնի է նաև, որ արևելահայ աշխարհաբարում պատճառական բայերի բեական հիմքը առր. եզ. 3-րդ դ. ձևում սկզբնապես հանդես էր բերում **ուց** վերջավորություն (< գրք. **ոյց** հիմքական ածանցից՝ վերափականավորմամբ): Արդ, ուշագրավ է, որ Յ. Շրյոդերի «Արամեան լեզուին գանձ» (Ամստերդամ, 1711) աշխատության մեջ «քաղաքացիական հայերենի» (այն է՝ ժամանակի արևելահայ աշխարհաբարի) քերականական ուրվագծում պատճառական բայերի առր. եզ. 3-րդ դ. համար նշվում է դեռևս միայն **ուց** վերջավորությունը (ավանդական **ոյց** գրությամբ) գրաբարատիպ ցոյական և նոր բեական հիմքով զուգածն խոնարհմամբ, ինչպես՝ առր. եզ. 1-ին դ. **մեծացուց-ի/մեծացր-ի**, եզ. 3-րդ դ. **մեծաց-ոյց/մեծացր-ոյց**, հոգ. 1-ին դ. **մեծացուց-ինք/մեծացր-ինք** և այլն²: Այն, որ տվյալ դեպքում **ոյց** գրությամբ արտահայտված է **ուց** վերջավորությունը, կասկածից վեր է, քանի որ արդեն միջին հայերենի շրջանում **ոյ > ու** հնյունափոխությունն ավարտված իրողություն է եղել³:

¹ Տե՛ս **Karst J.**, Historische Grammatik des Kilikisch-Armenischen, Strassburg, 1901, S. 336, 315-317, § 371:

² Տե՛ս **Schröder J. J.**, Thesaurus Linguae Armenicae, Antiquae et Hodierne (Արամեան լեզուին գանձ), Amstelodami, 1711, p. 317:

³ Տե՛ս Ակնարկներ միջին գրական հայերենի պատմության, հ. Ա., Երևան, 1972, էջ 102-103, նաև՝ **Karst J.**, նշվ. աշխ., էջ 25:

Հետազայում թեական հիմքով պատճառական բայերի առիստի *ուց* վերջավորությունը գրական արևելահայերենում և մի շարք բարբառներում է խոնարհման պարզ բայերի համարանությամբ փոխարինվել է *եց* վերջավորությամբ (վերջինս էլ իր հերթին առիստի *եց* հիմքակազմ ածանցի վերահմաստավորման արդյունք է): Արդեն XIX դարի 60-70-ական թթ. Ս. Պալասանյանը պատճառական բայերի եզ. 3-րդ դ. համար որպես հիմնական ձև տալիս է *եց* վերջավորությամբ ձևը (*հազգրեց*), իսկ *ուց* վերջավորությամբ տարբերակը (*հազգրուց*) իբրև ոչ հիմնական գուգածն նշվում է փակագծում¹: Իսկ ահա XX դարի սկզբներին Մ. Աբեղյանը պատճառական բայերի առ. եզ. 3-րդ դ. համար տալիս է միայն *եց* վերջավորությամբ ձևը (*զարմացրեց*, *փախցրեց*)²: Հետևաբար *ուցով* տարբերակը այդ ժամանակ արդեն կորցրել էր նույնիսկ ոչ հիմնական գուգածնի կարգավիճակը և վերջնականապես դուրս մղվել գրական լեզվից:

Սակայն որոշ բարբառներում առիստի թեական հիմք ունեցող պատճառական բայերը եզ. 3-րդ դ. ձևում անխախտ պահպանել են վաղ շրջանի *ուց* (< գրք. *ոյց*) վերջավորությունը³: Բնականաբար տվյալ դեպքում նկատի չեն առնվում գրաբարատիպ ցոյական հիմքը պահպանած բարբառները⁴, որոնցում *ուց* (< գրք. *ոյց*)-ը չի վերահմաստավորվել, այլ շարունակում է գործառել իբրև առիստի հիմքակազմ ածանց: Իսկ ահա որոշ բարբառներում թեական հիմքով պատճառական բայերի *ուց* վերջավորությունը ոչ միայն պահպանվել է որպես այդպիսին, այլև համարանությամբ տարածվել մի խումբ անկանոն բայերի վրա: Բայց ուշագրավ է, որ *ուց* վերջավորության համարանական ընդհանուրացումը տեղի է ունեցել ընտրողաբար, այսինքն՝ տարածվել է միայն որոշակի անկանոն բայերի վրա: Այսպես, Լոռու խոսվածքում այն հանդես է գալիս միայն *տալ*, *դրնիլ/դրնել*, *բերիլ/բերել*, *թռղալ* (< *թռղուլ*) բայերի առ. եզ. 3-րդ դ. ձևում (*տըշուց*, *դըրուց*, *բէրուց*, *թողուց*), մինչդեռ *անիլ/անել* և *ասիլ/ասել* բայերի առ. եզ. 3-րդ դ. ձևում առկա է -ավ վերջավորություն (*արավ*, *ասավ*)⁵: Շամշադին-Դիլիջանի խոսվածքում *ուց* վերջավո-

¹ Տե՛ս **Պալասանեան Ս.**, Ըստիանուր տեսութիւն արեւելեան նոր գրաւոր լեզուի հայոց, Թիֆլիս, 1870, էջ 79, *նույնի*՝ Քերականութիւն մայրենի լեզուի, Թիֆլիս, 1874, էջ 162:

² Տե՛ս **Աբեղյան Ս.**, Աշխարհաբարի քերականութիւն, Վաղարշապատ, 1906, էջ 109:

³ Տե՛ս **Ասատրյան Ս.**, Լոռու խոսվածքը, Երևան, 1968, էջ 138, **Մարգարյան Ալ.**, Գորիսի բարբառը, Երևան, 1975, էջ 207, 209, **Մեծուն Բ.**, Շամշադին-Դիլիջանի խոսվածքը, Երևան, 1989, էջ 90-92, **Բաղրամյան Ռ.**, Կողենի բարբառը, Երևան, 1961, էջ 139-140:

⁴ Տե՛ս օրինակ՝ **Աճառյան Հ.**, Քննություն Պոլսահայ բարբառի, Երևան, 1941, էջ 144, *նույնի*՝ Քննություն Վանի բարբառի, Երևան, 1952, էջ 180-182, **Դանիելյան Թ.**, Մալաթիայի բարբառը, Երևան, 1967, էջ 147:

⁵ Տե՛ս **Ասատրյան Ս.**, նշվ. աշխ., էջ 140-141: Թեև Ս. Ասատրյանը *թռղալ* և *ասիլ//ասել* բայերը զարմանալիորեն չի նշում անկանոն բայերի շարքում, բայց հայրենի խոսվածքի անձնական իմացության հիման վրա մենք ահա տալիս ենք այդ երկու անկանոն բայերի առիստի հարացուցը՝ *թռղի*, *թռղիր*, *թողուց*, *թողինք*, *թողիք*, *թողին* և *ասի*, *ասիր*, *ասավ*, *ասինք*, *ասիք*, *ասին*:

բությունը վկայված է **տալ**, **անիլ**, **պիրիլ**, **տրնիլ** անկանոն բայերի առրիստի հարացուցում, որտեղ այն զուգաձևություն է կազմում կա՝ մ աշ/վերջավորության, կա մ ավելի վաղ շրջանի նախահավելվածավոր ձևի հետ (հմմտ. **տալ** - **տրվուց/սոուվուց/տրվավ/իրէտ**, **անիլ** (< **անէլ**) - **արավ/արուց**, **պիրիլ** (< **բէրէլ**) - **պիրուց**, **էպիր**, **տրնիլ** (< **դնէլ**) - **տրրո՞վ/տրրուց**¹), իսկ, օրինակ, Կոզենի բարբառում *ուց* վերջավորությունը հանդես է զալիս անկանոն բայերից միայն **տալ** բայի առք. եզ. 3-րդ դ. ձևում՝ նախահավելվածավոր ձևին զուգահեռ (**բրէտ/տրվուց**²):

Ի դեպ, հայոց լեզվի պատմության և հայերեն բարբառների տվյալները վկայում են, որ առք. եզ. 3-րդ դ. կրավորածեն *աւ* (> *ավ*) վերջավորությունը աշխարհաբարում սկզբնապես ընդհանուր է եղել անկանոն բայերի համար. միջին հայերենում կրավորական վ ածանցի առաջացման հետևանքով այն աստիճանաբար զրկվել է բուն կրավորական նշանակությունից և վաղ աշխարհաբարում համարանությամբ տարածվել ներգործածն խոնարիստ և առրիստի արմատական հիմք ունեցող բայերի վրա փոխարինելով առք. եզ. 3-րդ դ. նախկին է նախահավելվածավոր կամ արմատական ձևին (իհարկե որոշ բարբառներում հիմնայերենյան/միջինհայերենյան նախահավելվածավոր ձևը պահպանվել է համապատասխան հնչյունափոխված տեսքով կա՝ մ որպես եզ. 3-րդ դ. միակ ձև, կա՝ մ որպես զուգաձև³), և այդպիսով՝ հարացուցի վերջավորությունից զուրկ միակ ձևը նույնպես օժտվել է դիմային վերջավորությամբ: Բայց դրա հետևանքով ձևավորվել է առրիստի յուրօրինակ անկանոն հարացուց եզ. 3-րդ դեմքում կրավորածեն, իսկ մնացած բոլոր դեմքերում ներգործածն վերջավորություններով⁴. հմմտ. **բէրի**, **բէրիր**, **բէրաւ**, **բէրինք**, **բէրիք**, **բէրին**, **դրի**, **դրիր**, **դրաւ**, **դրինք**, **դրիք**, **դրին**, **տվի**, **տվիր** **տվաւ**, **տվինք**, **տվին**, **զարկի**, **զարկիր**, **զարկաւ**, **զարկինք**, **զարկիք** **զարկին** և այլն: Վաղաշխարհաբարյան այդ անկանոն հարացուցը անփոփոխ պահպանվել է զրական արևմտահայերենում⁵: Մինչդեռ արևելահայ աշխարհաբարում աւ վերջավորությանը զուգահեռ առք. եզ. 3-րդ դ. նոր ձև է ստեղծվել՝ եց վերջավորությամբ, որով լեզուն փորձել է հարացուցի մյուս դեմքերի համարանությամբ եզ. 3-րդ դ. ձևին նույնպես ներգործածն վերջավորություն տալ և դրանով իսկ անկանոն (ոչ լիարժեք ներգործածն) հարացուցը դարձնել կանոնավոր ներգործածն⁶: Իհարկե այդ փոփոխությունը միան-

¹ Տե՛ս **Սեֆոնից Բ.**, նշան. աշխ., էջ 101-107:

² Տե՛ս **Բարբարյան Ռ.**, նշան. աշխ., էջ 151:

³ Տե՛ս օրինակ՝ **Սուլրադյան Ս.**, Շատախի բարբառը, Երևան, 1962, էջ 147-150, **Աճարյան Հ.**, Քննություն Համշենի բարբառի, Երևան, 1947, էջ 133-137, **Բարբարյան Ռ.**, նշան. աշխ., էջ 149-151:

⁴ Տե՛ս **Karst J.**, նշան. աշխ., էջ 324:

⁵ Տե՛ս **Այսունեան Ա.**, Քննական քերականութիւն աշխարհաբար կամ արդի հայերեն լեզուի, Վիեննա, 1866, մաս (2-րդ)՝ Քերականութիւն արդի հայերեն լեզուի, էջ 66-67:

⁶ Տե՛ս **Karst J.**, նշան. աշխ., էջ 325:

գամից չի կատարվել. օրինակ, գրական արևելահայերենում անկանոն բայերի առը. եզ. 3-րդ դ. ձևում *-աւ/-էց* զուգաձևությունը ընդհանուր առմամբ պահպանվել է մինչև XX դարի սկզբները: Մյուս կողմից արևելահայ աշխարհաբարում եզ. 3-րդ դեմքի ձևի հիման վրա առրիստի ցոյական հիմքով զուգաձևեր են կազմվել նաև մյուս դեմքերի համար, որով սկիզբ է դրվել անկանոն բայերի առրիստի *արմատական/ցոյական* զուգաձև խոնարհմանը *բերի, բերիր բերաւ, բերինք, բերիք, բերին և բերեցի, բերեցիր, բերեց, բերեցնք, բերեցիք, բերեցին և այլն¹*:

Գրական արևելահայերենի հետագա զարգացման ընթացքում ցոյական ձևերը ի վերջո հաղթող են դուրս եկել, այնպէս որ *բերել, անել, դնել, թողնել* (< զրբ. *թողով*), *տալ, զարկել* (< զրբ. *զարկանել*) բայերի առրիստի արմատական/ցոյական *բերի/բերեցի, արի/արեցի, դրի/դրեցի, թողի/թողեցի, տվի/տվեցի, զարկի/զարկեցի* զուգաձևերից արդի գրական լեզվի կանոնիկ ձևեր են ցոյական տարբերակները, իսկ արմատական ձևերը բնորոշ են խոսակցական լեզվին²: Նկատենք, որ *ասել* բայր նույնպէս արդի արևելահայերենում և մի շաբթ բարբառներում առրիստում արմատական/ցոյական զուգաձևություն է հանդես բերում՝ *ասի/ասացի* (/ասեցի/), սակայն, ի տարբերություն վերը բերված մյուս անկանոն բայերի, *ասել* բայրի դեպքում պատմականորեն նախնականը եղել է ցոյական հիմքը: Իսկ *ասի, ասիր, ասինք...* ձևերի արմատական հիմքը առաջացել է զուտ հնչյունափոխական ճանապարհով. միջին հայերենում առրիստի ցոյական եռավանկ ձևերում (*ասացի, ասացեր, ասացար, ասացէր/իք, ասացին*) միջնավանկի *ա* ձայնավորը օրինաչափորեն ընկել է (հմտ. մ. հայ. *ասցի, ասցար, ասցին* ձևերը³), իսկ հետագայում, ինչպէս կարելի է ենթադրել Քյարքյանջի բարբառում վկայված *ասցի/ասսի, ասցիր/ասսիր, ասցինք/ասսինք...* զուգաձևերից⁴, տեղի է ունեցել *սց > սս > ս* առնմանական հնչյունափոխություն և պարզեցում:

Գրական արևելահայերենում ցոյական ձևերի կողմից արմատական ձևերի աստիճանաբար դուրսման գործընթացը պատմականորեն սկսվել է եզ. 3-րդ դ. ձևից: Այսպէս, Ս. Պալասանյանը անկանոն բայերի *արմատական/ցոյական* զուգաձև իտուարիստի համար առիթով գրում է. «Թէև անցեալ կատարեալի երկու ձևն էլ անխտիր վարվում են, բայց աւելի սովորական է առաջին (այն է արմատական հիմքով – Ս. Ա.) ձևը, միայն եզ. 3-րդ դեմքում *եց* վերջաւո-

¹ Բերված ձևերի համար տե՛ս **Պալասանեան Ս.**, Ըսդհանուր տեսութիւն..., էջ 91-94, **Աբեղեան Ս.**, Աշխարհաբարի բերականութիւն, էջ 121-124:

² Տե՛ս **Ավետիսյան Յու.**, Տեղաշարժեր արդի գրական հայերենում, Երևան, 2011, էջ 57-59՝ այլուսակներով հանդիլ, **Ավետիսյան Յու.**, **Թեյան Լ.**, **Սարգսյան Լ.**, **Ավետիսյան Լ.**, Ուղեցույց հայոց լեզվի, զիրք Ա, Երևան, 2017, էջ 191, **Աբաջյան Ս.**, Տեղաշարժեր արդի հայերենի անկանոն բայերի համակարգում // Կրթությունը և գիտությունը Արցախում, հուլիս-դեկտեմբեր, 2014, 3-4, էջ 59-60:

³ Տե՛ս **Karst J.**, նշվ. աշխ., էջ 319, նաև՝ էջ 41-42:

⁴ Բերված ձևերի համար տե՛ս **Բաղրամյան Ռ.**, Շամախիի բարբառ, Երևան, 1964, էջ 166:

բութեամբ. *բերի*, *բերիր*, *բերեց*. *բերինք*, և այլն: *Դրի*, *դրիր*, *դրեց*. *դրինք*, և այլն: *Տուի*, *տուիր*, *տուեց*. *տուինք*, և այլն»¹: Արդ, մեջբերված հատվածից կարելի է գրական արևելահայերենի պատմության տեսանկյունից կարևոր երկու հետևություն անել. **ա)** XIX դարի 60-70-ական թթ. դեռևս ավելի ընդունված, կանոնիկ էին համարվում անկանոն բայերի առրիստի արմատական ձևերը, **բ)** բայց միևնույն ժամանակ արմատական առրիստի հարացույցում արդեն եզ. 3-րդ դ. -ավ վերջավորությամբ ձեզ ցոյական հարացույցի -եց վերջավորությամբ ձևով փոխարինելու միտում էր նկատվում:

Այդուհանդերձ, անկանոն բայերի առը. եզ. 3-րդ դ. -ավ/-եց զուգաձևությունը, ինչպես վերը նշվեց, գրական արևելահայերենում հիմնականում պահպանվել է մինչև XX դարի սկզբները², իսկ որոշ բայերի դեպքում՝ ընդհուպ մինչև նույն դարի առաջին տասնամյակները³: Բայց արդեն XX դարի 50-ական թթ. սկզբներին Հ. Բարսեղյանը նշված անկանոն բայերի առրիստի արմատական հարացույցի եզ. 3-րդ դ. համար որպես ընդունելի, կանոնիկ ձև տալիս է եց վերջավորությամբ տարբերակը (ինչպես *զարկի*, *զարկիր*, *զարկեց...*, *բերի*, *բերիր*, *բերեց...*, *դրի*, *դրիր*, *դրեց...*, *թողի*, *թողիր*, *թողեց...*): Իսկ որոշ բայերի դեպքում զուգահեռաբար փակազճում նշվող *ավ* վերջավորությամբ տարբերակը (*բերավ*, *դրավ*, *թողավ*) բնորոշվում է որպես հնացած ձև⁴: Հատկանշական է, որ նույնիսկ խոսակցական լեզվում, որտեղ անկանոն բայերի *արմատական/ցոյական* զուգաձևությունը ընդհանուր առմամբ այժմ էլ դեռ շարունակվում է, և ավելի նախապատվություն է տրվում արմատական ձևերին (ի տարբերություն գրական լեզվի), եզ. 3-րդ դ. ձեզ որպես կանոն կազմվում է -եց վերջավորությամբ, մինչդեռ -ավ-ով տարբերակը ընդհանուր առմամբ չի գործածվում⁵: Իսկ գրական լեզվում անկանոն բայերի առրիստի արմատական հարացույցի աստիճանաբար դուրսմղման և ցոյական ձևերի տարածման ու կանոնիկացման միտումը դեռևս XX դարի 30-ական թթ. սկզբին արձանագրել է Ս. Աբեղյանը. անկանոն բայերի *արմատական/ցոյական* զուգաձևերը տալիս նա հաճախ ուղղակիորեն նշում է ցոյական ձևերի նախընտրելիության կամ գոնե դրա ընդհանուր միտումի մասին «բայց ավելի ...», «բայց արդեն ավելի ...» բնորոշումներով⁶:

¹ **Պալասանեան Ս.**, Ընդհանուր տեսութիւն..., էջ 93-94:

² Հմմտ. **Աբեղեան Ս.**, Աշխարհաբարի քերականութիւն, էջ 121-124:

³ Հմմտ. **Աբեղյան Ս.**, Հայոց լեզվի տեսություն, Երևան, 1965 [1931], էջ 332:

⁴ Տե՛ս **Բարսեղյան Հ.**, Արդի հայերենի բայի և խոնարհման տեսություն, Երևան, 1953, էջ 303-304, 307-308:

⁵ Տե՛ս օրինակ՝ **Աբրահամյան Ս.**, Ժամանակակից գրական հայերեն, Երևան, 1981, էջ 225-227, **Ղարագույշան Թ.**, Ակնարկներ ժամանակակից հայերեն խոսակցական լեզվի // Ժամանակակից հայերեն խոսակցական լեզուն, Երևան, 1981, էջ 97, **Ավետիսյան Յու.**, նշվ. աշխ., էջ 57-59:

⁶ Տե՛ս **Աբեղյան Ս.**, Հայոց լեզվի տեսություն..., էջ 332:

Ինչ վերաբերում է նշված անկանոն բայերի առիստի հարացույցի բարբառային դրսնորումներին, ընդհանուր առմամբ նկատելի է չորս հիմնական տիպի զարգացում. **ա)** մի շարք բարբառներ գրական արևմտահայերենի նման պահպանել են վաղաշխարհաբարյան ոչ լիովին ներգործածի և արմատական հիմքով խոնարհման տիպը¹, **բ)** այլ բարբառներում վկայված է դարձյալ գերազանցապես արմատական հիմքով, բայց լիովին ներգործածի հարացույց: Ընդ որում՝ առ. եզ. 3-րդ դեմքում կա մ պահպանվել է հինհայերենյան/միջինհայերենյան նախահավելվածավոր ձևը², կա մ ել վաղաշխարհաբարյան ավ-ը փոխարինվել է եց վերջավորությամբ³, **գ)** մի խումբ բարբառներում էլ արմատական/ցոյական զուգածն հիմքով և լիովին ներգործածի խոնարհում է առկա, թեև արմատական հարացույցի ցոյականացումը հաճախ ոչ բոլոր անկանոն բայերի դեպքում է տեղի ունեցել լիակատար⁴, **դ)** իսկ որոշ բարբառներում արմատական հարացույցը փոխարինվել է ցոյականով, այսինքն՝ տեղի է ունեցել լիակատար ցոյականացում՝ ներգործածի խոնարհման տիպի պահպանմամբ⁵:

Ինչպես վերը տեսանք, արմատական առիստի վաղաշխարհաբարյան ոչ լիովին ներգործածի հարացույցի հետագա համարանական կանոնավորումը հիմնականում ընթացել է հարացույցի լիակատար ներգործածեացման ձանապարհով, այսինքն՝ հարացույցի միակ կրավորածն ավ վերջավորությունը փոխարինվել է ներգործածն եց վերջավորությամբ: Սակայն մի շարք բարբառներում որոշ անկանոն բայերի հարացույցում համարանական համահարթեցումը կատարվել է եզ. 3-րդ դ. ավ վերջավորությամբ ձևի հիման վրա, և ըստ այդմ տեղի է ունեցել նախսկին ոչ լիովին ներգործածի հարացույցի կրավորածեացում (օր.՝ Շամշադին-Դիլիջանի խոսվածքում՝ **պիրիլ** (< *բերել*) և **տրնիլ** (< *դնել*) բայերի դեպքում⁶): Երբեմն էլ կրավորածեացման գործընթացն ընդգրկել է տվյալ բայի միայն եզակի թվի ձևերը,

¹ Տե՛ս **Աճառյան Հ.**, Քննություն Պոլսահայ..., էջ 131-133, **Դամիելյան Թ.**, Մալաթիայի բարբառ..., էջ 150-152, **Կոստանդյան Դ.**, Երզնկայի բարբառը, Երևան, 1979, էջ 116: Իսկ, օրինակ, Համշենի բարբառում եզ. 3-րդ դ. ավ վերջավորությամբ ձևին զուգահեռ պահպանվել է նաև հինհայերենյան/միջինհայերենյան նախահավելվածավոր ձևը: Տե՛ս **Աճառյան Հ.**, Քննություն Համշենի..., էջ 133-137: Մինչդեռ Նոր Նախիջևանի և Կարն բարբառներում դարձյալ արմատական հիմքով և ներգործածի հարացույցի առ. եզ. 3-րդ դ. ձևում ըստ բայերի հանդես է զայիս կա մ ավ, կա մ եց վերջավորությունը: Տե՛ս **Աճառեան Հ.**, Քննութիւն Նոր-Նախիջևանի (Խրիմի) բարբառի, Երևան, 1925, էջ 273-277, 281-282, **Մկրտչյան Հ.**, Կարն բարբառը, Երևան, 1952, էջ 85-86:

² Տե՛ս օրինակ՝ **Սուրայյան Մ.**, Շատախի բարբառ..., էջ 147-149:

³ Տե՛ս օրինակ՝ **Ասատրյան Մ.**, Ուրմիայի (Խոյի) բարբառը, Երևան, 1962, էջ 131, 133-134:

⁴ Հմմտ. **Սադարյան Ք.**, Ալաշկերտի խոսվածքը (Ապարան-Արագածի տարածք), Երևան, 1985, էջ 134, 136:

⁵ Հմմտ. **Լուսենց Ա. Դ.**, Արեշի բարբառը, Երևան, 1982, էջ 121-123, **Հանեյան Ա.**, Տիգրանակերտի բարբառը, Երևան, 1978, էջ 131-132:

⁶ Համապատասխան ձևերի համար տե՛ս **Մեծունց Բ.**, նշվ. աշխ., էջ 105, 107:

իսկ հոգնակիում պահպանվել է ներգործածի խոնարհումը (օր՝՝ Բուրդուրի բարբառում՝ պիրիլ բայի դեպքում. հմմտ. պէրա, պէրար, պիրավ, պիրինք, պիրիք, պիրին¹): Բայց անկանոն բայերի առիստի հարացույցը առավել խայտարդետ պատկեր է ներկայացնում Գորիսի բարբառում: Այսպես, **անէլ** բայր՝ միաժամանակ հանդես է բերում արմատական հիմքով վաղաշխարհաբարյան ոչ լիովին ներգործածի (ըրի, ըրիր, ըրավ...) և ցոյական հիմքով լիակատար ներգործածի խոնարհում (ըրէցի, ըրէցիր, արէց...), **պիրէլ** (< բերէլ) բայր՝ միայն արմատական հիմքով ներգործածի/կրավորածի խոնարհում (պէրի/պիր², պէրիր/պիր³ր, պէրր/պիր⁴վ...), **տինէլ** (< դնէլ) բայր՝ միայն արմատական հիմքով կրավորածի խոնարհում (տիր⁵, տիր⁶ր, տիր⁷վ...), իսկ **տալ** բային բնորոշ են և՝ արմատական/ցոյական, և՝ ներգործածի/կրավորածի խոնարհումային զուգաձևություններ (տրվի/տրվա (/տրվէցի), տրվիր/տրվար (/տրվէցիր), տրվավ (/տրվէց...)²:

Ինչ վերաբերում է անկանոն բայերի առը. եզ. 3-րդ դ. ձևին, ինչպես վերը տեսանք, արդի երկու գրական լեզուներում և բարբառների մեծ մասում իբրև առը. եզ. 3-րդ դ. վերջավորություն հանդես է գալիս կա՛մ **ավ-ը**, կա՛մ **եց-ը**: Իսկ մի շարք բարբառներում պահպանվել են առը. եզ. 3-րդ դ. հինհայերենյան/միջինհայերենյան նախահավելվածավոր ձևի համապատասխան հնչունական արտացոլումները: Բայց առավել ուշագրավը և առաջին հայցից անսպասելին պատճառական բայերի *ուց* վերջավորության առկայությունն է որոշ բարբառներում մի խումբ անկանոն բայերի առը. եզ. 3-րդ դ. ձևում: Հետազոտողները լավագույն դեպքում պարզապես նշում են, որ անկանոն բայերը *ուց* վերջավորությունը ձեռք են բերել պատճառական բայերի համարանությամբ³, բայց սովորաբար չի բացատրվում, թե կոնկրետ ինչպէ՞ս և ձևաբանական-համարանական ի՞նչ հարաբերակցության հիման վրա է *ուց* վերջավորությունը ներթափանցել անկանոն բայերի առիստի հարացույց:

Մեր կարծիքով, նշված համարանական-ձևաբանական գործընթացը տեղի է ունեցել խմբային նմանության (family resemblance) սկզբունքի համաձայն: Բանն այն է, որ խոսողների գիտակցության մեջ իրական աշխարհի առարկաների և երևույթների կարգադասումը (categorization) մեծ մասամբ իրականացվում է խմբային նմանության սկզբունքով: Վերջինիս էռությունն այն է, որ տվյալ կարգախմբի (category) բոլոր անդամները անհրաժեշտաբար չեն բնութագրվում ձիշտ նույն քանակությամբ ընդհանուր հատկանիշների ամբողջությամբ, այլ անդամներից մեկը, որն օժտված է այդ կարգախմբի հա-

¹ Բերված ձևերի համար տե՛ս **Մկրտչյան Ն.**, Բուրդուրի բարբառ, Երևան, 1971, էջ 155:

² Բերված ձևերի համար տե՛ս **Սարգսյան Ալ.**, Գորիսի բարբառ..., էջ 217-219:

³ Տե՛ս օրինակ՝ **Մեծունց Բ.**, նշվ. աշխ., էջ 78, ծան.: Մինչդեռ Ս. Ասատրյանը Լոռու խոսվածքը, իսկ Ռ. Բաղրամյանը Կողենի բարբառը դիտարկելիս ընդամենը արձանագրում են *ուց* վերջավորության առկայության փաստը: Տե՛ս և **Ասատրյան Ս.**, Լոռու խոսվածքը..., էջ 29, նաև էջ 138, 141, **Բաղրամյան Ռ.**, Կողենի բարբառ..., էջ 151, նաև՝ էջ 139-140:

մար տիպական բոլոր կամ հնարավորինս առավել քանակությամբ հատկանիշներով, առանցքային դիրք է գրավում կարգախմբում: Իսկ մյուս անդամները կարող են ունենալ բացակայող առանձին հատկանիշներ հիմնական անդամի (prototype) համեմատությամբ և, ըստ այդմ, այս կամ այն չափով եզրային դիրք գրադարձնել կարգախմբի ներսում: Կարեւորն այն է, որ անդամներից յուրաքանչյուրն ունենա առնվազն մեկ ընդհանուր հատկանիշ նույն կարգախմբի մեկ այլ անդամի հետ AB, BC, CD, DE սկզբունքով, որի շնորհիվ կարգախմբի բոլոր անդամները միասին կազմում են խմբային նմանության շղթա¹: Հայտնի է նաև, որ խոսդղների գիտակցության մեջ քերականական ձևերի կարգադասումը նույնպես շատ հաճախ կատարվում է խմբային նմանության սկզբունքով², և որ ձևաբանական-համարանական փոփոխությունները լեզվական երևույթների մտածական արտացոլումների կարգադասման մեջ կատարվող փոփոխություններ և տեղաշարժեր են ներկայացնում³:

Արդ, կարծում ենք որոշ բարբառներում մի շարք անկանոն բայերի առը. եզ. 3-րդ դ. ձևում *ուց վերջավորության* առկայությունը նույնպես հեշտությամբ բացատրվում է խմբային նմանության սկզբունքով: Նախ դիտարկենք Լոռու խոսվածքի տվյալները, որտեղ պատկերն ավելի անաղարտ է: Նկատենք, որ Լոռու խոսվածքում, ինչպես և արդի գրական արևելահայերենում, պատճառական բայերի մեջ կան այնպիսիները, որոնց վանկակառուցվածքային առանձնահատկություններով պայմանավորված՝ առրիստի ձևերի

-ցրի, -ցրիր... հնչունակապակցությունները արտասանվում են ը ձայնավորով՝ -ցըրի,

-ցըրիր...⁴ հմմտ. *հարցըրնիլ/ել*, առը. *հարցըրի, կոոցըրնիլ/ել*, առը. *կոոցըրի, փախցըրնիլ/ել*, առը. *փախցըրի, թրոցըրնիլ/ել*, առը. *թրոցըրի, հասցըրնիլ/ել*, առը. *հասցըրի* և այլն: Ըստ այդմ՝ դրնիլ/դրնել բայր առը. դըրի, դըրիր... ձևերի հիման վրա խմբային նմանության սկզբունքով զուգորդվել է հիշյալ պատճառական բայերի հետ՝ որպես խոնարհման վերջավորություններին անմիջապես նախորդող հիմքային մասի զգալիորեն նման հնչյունաշարակարգային կառուցվածք (phonotactic structure) ունեցող բայ, և պատճառական բայերի համարանությամբ ստացել առը. եզ. 3-րդ դ. *ուց վերջավորությունը*: Այդ առումով ուշագրավ է, որ դրնիլ/դրնել բայի եզակի հրամայականի ձևը նույն-

¹Տե՛ս Eleanor Rosch, Carolyn B. Mervis, Family Resemblances: Studies in the Internal Structure of Categories // “Cognitive Psychology” 7, 1975, p. 573-605, Eleanor Rosch, Principles of Categorization // Collins A., Smith E. E. (eds.), Readings in Cognitive Science: A Perspective from Psychology and Artificial Intelligence, San Mateo, California, 1988, p. 316 և հազ.:

²Տե՛ս օրինակ՝ Bybee J., Frequency of Use and the Organization of Language, Oxford University Press, 2007, ch. 6, p. 127-147:

³Տե՛ս Bybee J., Beckner C., Language Use, Cognitive Processes and Linguistic Change // Bowern C., Evans B. (eds.), The Routledge Handbook of Historical Linguistics, London and New York, 2015, p. 505-507:

⁴Տե՛ս Ասատրյան Մ., Լոռու խոսվածքը..., էջ 137-138:

պես պատճառական բայերի հետևողությամբ կազմվում է ու վերջավորությամբ՝ դի՛ք (< դի՛ք) ձևին զուգահեռ (Եզ. հրմ. դի՛քը ու ի, հոգ. հրմ. դրուէք)¹: Մյուս կողմից, դրնիլ/դրնել բայի առը. դրիի, դրիիր, դրուց... հարացույցն էլ իր հերթին խմբային նմանության սկզբունքով նոր կարգախումբ է ձևավորել հանդես զայռվ որպես տվյալ կարգախմբի հիմնական անդամ: Վերջինիս հետ կարգախմբի անդամներից յուրաքանչյուրն ունի որոշակի համընկնող հատկանիշներ, թեև բոլոր անդամները չունեն ճիշտ նույն քանակությամբ և նույնպիսի ընդհանուր հատկանիշներ: Այսպես, տրվի ձևը դրիի ձևի հետ ունի երեք համընկնող հատկանիշ՝ առիստի հիմքի միավանկությունը, արմատական ը ձայնավորի առկայությունը և առիստի հիմքի CVC (այն է՝ բաղաձայն+ձայնավոր+բաղաձայն) հնչյունաշարակարգային կառուցվածքը: Բերի ձևը դրիի ձևի հետ ունի դարձյալ երեք համընկնող հատկանիշ՝ առիստի հիմքի միավանկությունը, առիստի հիմքի CVC հնչյունաշարակարգային կառուցվածքը և հիմքի վերջնահնչյունը թ բաղաձայնի առկայությունը: Մյուս կողմից, տվյալ կարգախմբի ներսում բերի և տրվի ձևերի առկայության շնորհիվ խոսողները բնականաբար պետք է հետևություն անեն, որ այդ կարգախմբի բայը կարող է պարունակել ոչ միայն թ, այլև մեկ ուրիշ ձայնավոր, և որ իբրև բայահիմքի վերջնահնչյուն կարող է հանդես զալ նաև թ-ից տարբեր մեկ այլ բաղաձայն: Անշուշտ, խոսողների գիտակցության մեջ հիշյալ բերականական ձևերի հնչյունաշարակարգային կառուցվածքի այդ կերպ ըմբռնման և վերլուծության շնորհիվ է հնարավոր դարձել առը. թողի, թողիր... հարացույցը նույնպես ներառել տվյալ կարգախմբի մեջ, որը հիմնական անդամի (այն է՝ դրիի, դրիիր... հարացույցի) հետ ունի ընդամենը համընկնող երկու անդամ՝ առիստի հիմքի միավանկությունը և CVC հնչյունաշարակարգային կառուցվածքը, ուստի համեմատաբար ավելի եզրային դիրք է գրավում կարգախմբում, քան բերի, բերիր... և տրվի, տրվիր... հարացույցները: Միևնույն ժամանակ թողի ձևը առիստի արմատական ը ձայնավորից տարբեր մեկ այլ ձայնավորի առկայությամբ զուգորդվում է բերի, իսկ առիստի հիմքի վերջնահնչյուն թ-ից տարբեր մեկ այլ բաղաձայնի առկայությամբ՝ տրվի ձևերի հետ: Դրանով իսկ՝ բերված բոլոր չորս անկանոն բայերի առիստի ձևերը միասին կազմում են խմբային նմանության շղթա, որում ներառված բայերի առիստի բայահիմքը բնութագրվում է երկու առավել ընդհանրական հատկանիշով՝ միավանկությամբ և CVC հնչյունաշարակարգային կառուցվածքով: Ընդ որում թե՝ առիստի հիմքի միավանկությունը և թե՝ CVC հնչյունաշարակարգային կառուցվածքը Լոռու խոսվածքում խոսող-

¹ Թեև Ս. Ասատրյանը որպես դրնիլ/դրնել բայի եզակի հրամայական նշում է միայն դի՛ք ձևը (տե՛ս Ասատրյան Ս., Լոռու խոսվածքը..., էջ 141), բայց հաստատապես կարող ենք ասել, որ գոնե Ալավերդի քաղաքում և շրջակա գյուղերում, որտեղ անցել է մեր մանկությունը և պատանեկությունը, դրնիլ/դրնել բայը եզակի հրամայականի ձևում դի՛քը ու զուգաձևություն է հանդես բերում:

ների կողմից ընկալվել են որպես չափազանց կարևոր բնութագրական հատկանիշներ տվյալ կարգախմբի համար: Այդ պատճառով է, օրինակ, VC (այն է՝ *ձայնավոր+բաղաձայն*) հնչյունաշարակարգային կառուցվածք ունեցող անիլ/անել և ասիլ/ասել բայերը չեն կարողացել միանալ այս կարգախմբին և *ուց վերջավորություն ստանալ* (հմմտ. առը. *ասավ/և արավ/ձևերը*):

Անշուշտ Շամշադին-Դիլիջանի խոսվածքում ևս առը. եզ. 3-րդ դ. *ուց վերջավորությունը անկանոն բայերի վրա տարածվել է խմբային նմանության սկզբունքով:* Սակայն Լոռու խոսվածքի համեմատությամբ այստեղ տարբերությունն այն է, որ տվյալ կարգախմբի բայերի առիստի հնչյունաշարակարգային կառուցվածքի ըմբռնումը որոշակի ընդլայնման է ենթարկվել, որը հնարավորություն է տվել շարքի մեջ ներառել նաև VC (*ձայնավոր+բաղաձայն*) հնչյունաշարակարգային կառուցվածքը ունեցող նոր անդամ (հմմտ. *անիլ*, առը. եզ. 3-րդ դ. *արավ/արուց*): Բացի այդ, հետագա նորանոր համարանական փոփոխությունները հաճախ մթագնել են սկզբնական դրությունը, որը համեմատաբար լավ պահպանվել է միայն *տալ* և *անիլ* բայերի առիստի հարացույցում. հմմտ. *տրվի, տրվիր, տրվուց/տուվուց/տրվավ/իրէտ, տրվինք, տրվիք, տրվին և արի, արիր, արավ/արուց, արինք, արիք, արին:* Մինչդեռ պիրիլ և *տրնիլ* բայերի առիստի հարացույցը, եզ. 3-րդ դ. *ուց վերջավորություն ստանալով հանդերձ, նախկին ավ վերջավորության հիման վրա կրավորածեացման է ենթարկվել. հմմտ. պիրա, պիրար, պիրուց/էպիր, պիրանք, պիրաք, պիրան և *տրրան, տրրանք, տրրանվ/տրրուց, տրրանք, տրրանք, տրրանն¹:* Կարծում ենք՝ կասկած չի կարող լինել, որ *ուց վերջավորությունը պիրիլ և տրնիլ* բայերի առիստի հարացույց է ներթափանցել դեռևս ներգործածն խոնարհման պարագայում: Այն, որ հարացույցի կրավորածեացումից հետո վերջինս այլևս չէր կարող *ուց վերջավորություն ստանալ, ակնհայտ երևում է ուտիլ և տանիլ* բայերի առիստի հարացույցից, որոնք թեև առիստի հիմքի հնչյունաշարակարգային կառուցվածքի տեսանկյունից լիովին բավարարում են տվյալ կարգախմբի պահանջները, այդուհանդերձ *ուց վերջավորություն չեն ստացել, քանի որ ի սկզբանե ունեցել են առիստի կրավորածն հարացույց՝ կէրա, կէրար, կէրավ, կէրանք, կէրաք, կէրան և տարա, տարար, տարավ, տարանք, տարաք, տարան:* Ուստի պետք է ենթադրել, որ պիրիլ բայլ նույնպես առը. եզ. 3-րդ դ. ձեռում սկզբնապես *ավ վերջավորությամբ ձև է ունեցել (նախահավելվածավոր էպիր ձևին զուգահեռ), որը *ուց վերջավորության ներթափանցումից հետո էլ դեռ շարունակել է գործառել մի որոշ***

¹ Բերված ձևերի համար տե՛ս **Մեժունց Բ.**, նշվ. աշխ., էջ 101-107: Ի դեպ, *ուց վերջավորություն* ունեցող անկանոն բայերի կարգախմբի հնչյունաշարակարգային կառուցվածքի նույնպիսի ընդլայնում տեղի է ունեցել նաև **Աշտարակի խոսվածքում**, ինչպես կարելի է ենթադրել առը. եզ. 3-րդ դ. *արուց, բերուց, տվուց, դրուց ձևերից*, որոնց համար տե՛ս **Ասատրյան Մ.**, Լոռու խոսվածքը..., էջ 29:

² Բերված ձևերի համար տե՛ս **Մեժունց Բ.**, նշվ. աշխ., էջ 103, 106:

ժամանակահատված՝ համարանական հիմք ծառայելով ներգործածի հարացույցի կրավորածնացման համար, իսկ հետազայում պիրուց/էպիր զուգաձևերի կողմից դուրս մղվել հարացույցից: Մյուս կողմից, անշուշտ հավանական է, որ Շամշադին-Դիլիջանի խոսվածքում նույնպես առը. եզ. 3-րդ դ. ձևում *ուց* վերջավորություն ունեցող բայերի կարգախմբի ձևավորման հարցում առանցքային դեր է խաղացել դարձյալ *տընիլ* բայի առրիստի հարացույցը՝ իր սկզբնական ներգործածի խոնարհմամբ՝ *տըրի, տըրիր..., բանի* որ վերջինիս առրիստի հիմքը հնչյունաշարակարգային կառուցվածքով համեմատաբար ամենամոտն է պատճառական բայերի առրիստի հիմքին: Մանավանդ, որ Շամշադին-Դիլիջանի խոսվածքում անխստիր բոլոր պատճառական բայերի առրիստի ձևերում *-ցրի, -ցրիր...* հնչյունակապակցությունները միշտ արտասանվում են ը ձայնավորով՝ *-ցըրի, -ցըրիր...*¹: Այդուհանդեռձ չպետք է թերագնահատել նաև *տըլի, տըլիր...* առրիստի հարացույցի հնարավոր դերը տվյալ կարգախմբի ձևավորման հարցում, եթե հաշվի առնենք, որ, օրինակ, Կողենի բարբառում, ինչպես վերը նշվեց, անկանոն բայերից միայն *տալ* բայն է պատճառական բայերի համարանությամբ առը. եզ. 3-րդ դ. ձևում ստացել *ուց* վերջավորությունը (*տըլուց*): Անշուշտ դրա պատճառն այն է, որ տվյալ համարանական գործընթացը այս դեպքում չի ընդհանրացել և ընդգրկել համանման հնչյունաշարակարգային կառուցվածքը ունեցող բոլոր անկանոն բայերը: Բայց դա միևնույն ժամանակ ցույց է տալիս նաև, որ սկզբունքորեն առրիստի հիմքի ԸթC (այն է՝ *բաղաձայն + ը ձայնավոր + բաղաձայն*) հնչյունաշարակարգային կառուցվածքն ինքնին արդեն լիովին բավարար է, որպեսզի տվյալ բայը խմբային նմանության սկզբունքով զուգորդվի պատճառական բայերի առրիստի հարացույցի հետ և համապատասխան համարանական փոփոխության ենթարկվի: Ուստի կարծում ենք՝ Լոռու, Շամշադին-Դիլիջանի և Աշտարակի խոսվածքներում ևս *տըլի, տըլիր...* հարացույցը (*դըրի, դըրիր...* հարացույցին զուգահեռ) կարող է զգալի դեր խաղացած լինել *ուց* վերջավորությամբ անկանոն բայերի կարգախմբի ձևավորման հարցում:

Այսպիսով՝ արևելահայերեն և արևմտահայերեն գրական լեզուների և հայերեն բարբառների վերը բերված տվյալների քննությունից ակնհայտ երևում է, որ անկանոն բայերի առրիստի վաղաշխարհաբարյան ոչ լիովին ներգործածի հարացույցը հետազայում գրական արևելահայերենում և բարբառների մի մասում ենթարկվել է համարանական համահարթեցման և համարանական ընդլայնման գործընթացների համատեղ ազդեցությանը: Ընդհանուր առմամբ նկատելի է փոփոխության երեք հիմնական միտում. **ա)** արմատական հարացույցի ցոյականացում եզ. 3-րդ դ. *էց* վերջավորությամբ ձևի հիման վրա, **բ)** ոչ լիովին ներգործածի հարացույցի կանոնավորում լիա-

¹Տե՛ս Սեմոնց Բ., նշվ. աշխ., էջ 89:

կատար ներգործածնացման ձանապարհով, որի ժամանակ կա՛մ պահպանվել է հարացույցի ընդհանուր արմատական բնույթը, կա՛մ տեղի է ունեցել ցոյականացում, զ) հարացույցի կանոնավորում եզ. 3-րդ դ. այլ վերջավորությամբ ձևի հիման վրա կրավորածնացման ձանապարհով՝ հարացույցի արմատական բնույթի պահպանմամբ: Իհարկե նշված երեք միտումները ունեցել են դրսնորման տարբեր աստիճան ոչ միայն տարբեր բարբառներում, այլև երբեմն նույն բարբառի առանձին անկանոն բայերի դեպքում, այսինքն՝ գործել են ոչ լիակատար կերպով: Իսկ առկա գուգածնությունները մասսամբ այդ տարբեր միտումների մրցակցային պայքարի, մասսամբ էլ նրանց համատեղ գործողության արդյունք են: Մյուս կողմից, գրական արևմտահայերենում և մի խումբ բարբառներում առրիստի վաղաշխարհաբարյան հարացույցը պահպանվել է անփոփոխ: Ինչ վերաբերում է անկանոն բայերի առը. եզ. 3-րդ դ. ձևին, արդի երկու գրական լեզուներում և բարբառների մեծ մասում իրու առը. եզ. 3-րդ դ. վերջավորություն հանդես է գալիս կա՛մ **ավ-ը**, կա՛մ **եց-ը**: Մինչդեռ մի շարք բարբառներում պահպանվել են առը. եզ. 3-րդ դ. հինհայերենյան/միջինհայերենյան նախահավելվածավոր ձևի համապատասխան հնչյունական արտացոլումները: Իսկ որոշ բարբառներում պատճառական բայերի համարանությամբ *ուց* վերջավորությունը ներթափանցել է որոշակի անկանոն բայերի առրիստի հարացույց խմբային նմանության սկզբունքով: Ըստ որում՝ թեև առը. *ուց* վերջավորություն ունեցող անկանոն բայերի կարգախմբի հիմնական անդամը եղել է առը. *դրդիր...* հարացույցը, բայց *տրվի*, *տրվիր...* հարացույցը նույնպես ամենայն հավանականությամբ զգալի դեր է խաղացել տվյալ կարգախմբի՝ ձևավորման հարցում: Մյուս կողմից, ի տարբերություն Լոռու խոսվածքի՝ Շամշադին-Դիլիջանի և Աշտարակի խոսվածքներում խոսողների գիտակցության մեջ տվյալ կարգախմբի բայերի առրիստի հիմքի հնչյունաշարակարգային կառուցվածքի կաղապարը որոշակի ընդլայնման է ենթարկվել՝ CVC >> (C)VC, որը հնարավորություն է տվել խմբի մեջ ներառել նաև VC (ձայնավոր+բաղաձայն) հնչյունաշարակարգային կառուցվածք ունեցող նոր անդամ:

Саргис Аветян – Распространение окончания *ՈՒՅ* на определенные нерегулярные глаголы в некоторых диалектах по принципу группового сходства

В статье аргументируется, что аналогическое распространение окончания аориста *ուց* каузативных глаголов на определенные нерегулярные глаголы (ср. аористные формы *դրդուց*, *տրվուց*, *բէրուց*, *բողուց*) в некоторых армянских диалектах можно объяснить принципом группового сходства (family resemblance). В частности, аористная основа глагола *դնել* благодаря большому сходству своей фонотактической структуры с конечной (суффиксальной) частью каузативных глаголов сыграла решающую роль при образовании данного класса нерегулярных глаголов, тем самым послужив прототипом внутри группы. В лорийском говоре как односложность, так и фонотактическая структура CVC аористной основы воспринимались говорящими как две равно важные критериальные

характеристики, определяющие принадлежность к данному классу. Поэтому глаголам *անիլ/անել* и *ասիլ/ասել*, имеющим фонотактическую структуру VC, не удалось присоединиться к данной группе и принять окончание *-nig*. Однако в шамшадин-дилижанском и аштаракском говорах данный класс расширялся дальше благодаря тому, что фонотактическая структура VC тоже стала допустимой (ср. аористные формы *ար-ի*, *ար-իր*, *ար-nig...*).

Sargis Avetyan – *The Extension of the Ending -NIG to Certain Irregular Verbs in Some Dialects by the Principle of Family Resemblance*

It is argued in the paper that the analogical extension of the aorist ending *-nig* of causative verbs to certain irregular verbs in some Armenian dialects (cf. the aorist forms *դըրուց*, *բէրուց*, *քողուց*) can be accounted for by the principle of family resemblance. Specifically, the aorist stem of the verb *դընել* due to its phonotactic structure being highly similar to that of the final (suffixal) part of causative verbs (cf. *գըր-ի*, *գըր-իր...* and *հաս-գըր-ի*, *հաս-գըր-իր...*), has played a pivotal role in the formation of this class of irregular verbs, thereby serving as the prototype within the group. In the subdialect of Lori both the monosyllabicity and phonotactic structure CVC of the aorist stem have been conceived of as two equally important criterial features by speakers in determining the class membership. That is why the verbs *անիլ/անել* and *ասիլ/ասել*, as having phonotactic structure VC, have failed to join the class and acquire the ending *nig*. However, the class has been expanded further in the subdialects of Shamshadin-Dilijan and Ashtarak due to the fact that the phonotactic structure VC also became permissible (cf. the aorist forms *ար-ի*, *ար-իր*, *ար-nig...*).

Ներկայացվել է 18.12.2019

Գրախոսվել է 04.12.2019

Ընդունվել է տպագրության 10.03.2020